

松

心

詩

錄

松心詩錄卷四

番禺 張維屏 子樹

上瀧

萬鼓喧晴雷千花滾雪瀑水同鄒魯開石類晉楚搏舟師持一  
箭左右與之角紆徐蟻穿珠迅疾蛇赴壑路窮泥丸封厓轉鐵  
壁鑿我纜車箱通彼已箭筈落舟小猶樊籠俯首就束縛垂頭  
鶴氅氍毹側足蟹郭索有時蜂出房竟夕蝸入殼箭密烟冥冥楓  
豔火灼灼不知身已高但覺裘漸薄嗟哉呼邪輩層冰插雙脚  
眞成白鍊剛諺云紙船鐵篙上尙慮一个弱再換小舟名單船緬懷昌黎公南  
來此曾泊忠誠石可貴地險孰云惡至今瀧姓韓過客爲肅若  
吾曹習宴安遇坎藉磨錯決背收瓊奇抽毫凜芒鏘

浮湘四首

湘水碧羅羅微風吹欲波霧因衡嶽重月到洞庭多遠信遲歸  
雁寒更促吼蠟悵然思屈賈中夜一悲歌

詞賦孤忠著文章弱冠鳴行吟託漁父痛哭爲蒼生前席言何  
益沉沙骨亦清知心有良史合傳本天成

夢澤江流滙衡陽水利通天低巴子國雲暗楚王宮野竹瘦逾  
綠霜楓疎更紅歲時應續記不必問雄風

楚思集騷抱征途多古歡奇文徵岫嶠香草辨椒蘭書擬荊州

借花同漢女看此行合西笑

粵東謂由楚  
入都爲西路

紅日近長安

寄內

頻年索米效東方珍重飛鴻字數行客況近來清似水一篷風

雪泊瀟湘

洞庭湖大風雪放歌

蜚廉赫怒鞭五丁排山倒海聲砰鏗巨靈空際一鼓掌忽徙玉  
京來洞庭嚴冬水落黃沙積天意似憐洞庭窄全湖頃刻堆琉  
璃千里空明同一色我疑洞庭君龍戰東海涯赤龍長驅白龍  
北鱗甲萬片隨風飛又疑湘夫人雲中正沈醉并刀亂剪英瓊  
瑤幻作天花散平地層冰壓水勢未休老蛟僵伏征鴻愁紅塵  
變滅何足道一夜白了君山頭撒鹽起絮才雖好畢竟纖纖言  
近小玉田萬頃盡膏腴炊作瓊漿供一飽党家小兒慙且癡但  
解帳底陪妖姬袁家高士頗不俗又苦瑟縮同蚶蜊岳陽咫尺  
無多路凌晨跨鶴橫江去純陽老仙當復來不醉茲樓醉何處

書生豪語且勿誇亦勿險韻哦尖叉大河以北百萬家望歲未  
免勞吁嗟方珪圓璧天弗惜下尺上尺嘉禾嘉窮民無告收秉  
穗富家大吉盈箝車此時對酒歌白雪不憂凍管難生花詩成  
雪霽亦快意湘東角舒紅霞

楚中懷古

上公衡嶽鎮南維綠字昔封岫嶠碑召虎來營江漢宅鬻熊去  
作帝王師菁茅易納荊州貢櫓机難搜楚史遺聞道重華停翠  
輦蒼梧雲影至今疑

帆隨湘轉見平川淚竹斑斑斷岸前三戶人烟沿漢水九疑山  
色壓蠻天風騷自結芙蓉佩詞賦真同日月懸目極長沙傷賈  
傅竟將憂患損華年

三巴盤曲抱江根七澤蒼茫接海門南國哀絃騷客些東風香  
草美人魂烏騅事業悲長劍黃絹文章託大言流水桃花隨處  
有不須重問武陵源

雪花飛過洞庭東一片湖光入混濛臣里夢魂春樹外君山眉  
黛曉烟中賦成鸚鵡才何益悟到軒轅樂本空眼底蒲帆三百  
幅快哉同借大王風

楚中懷古

譚 瑩

峴山碑在姓名留宋玉微詞土一坏偕隱龐公時上環倦游  
王粲獨登樓周郎決戰成三國士行清忠督八州莫問九原  
誰可作滔滔江漢日東流

黃鶴樓

仙人去後詞人去但見長江日夜流江上白雲應萬變樓前黃  
鶴自千秋滄桑易使乾坤老風月難消今古愁惟有多情是春  
草年年新綠滿芳洲

酬吳巢松編修兼寄沈閩生茂才

傳桂

豐山得霜鐘自鳴柯亭見竹知笛聲感通於此悟物理篇什况  
足移人情延陵仙人海濱遇片帆欲返東吳去不愛珍奇陸賈  
裝却取清寒孟郊句一徑蓬蒿深閉門家餘傲帶強自珍定文  
誰是丁敬禮解嘲或笑揚子雲神交喜得東陽彥千里苔岑託  
深眷秀菊幽蘭各自芳東勞西燕何時見城南韋杜尺五天岑  
華示我雲錦篇篇中似覩沈郎面一枝玉樹臨風前沈郎少年  
富文藻吳季愛才數傾倒江上芙蓉秋未老肯使西風怨枯槁

元和聖德中和詩會見簪毫向蓬島

十年前余自輿攜南山孝廉詩卷歸吳中沈閨生茂才見而賦詩欣賞余因和之并寄南山

吳縣

吳慈鶴

巢松

西海有玄禽東海有比目間隔三萬里相思不能託吳下有沈生番禺有張子文采各光怪面目渺秋水賤子聊爲嶺外游每騎竹杖訪張侯攜將一卷驚人句歸與東陽作蹇修東陽一笑空時彥目有紫光巖下電睹詩渾似得施嬌坐擁行吟夢還見長歌示我何清新誓與張子通殷勤媿我空居十年長凡鱗敗羽無精神安能一疏薦兩生給札盡到承明庭各懷范岫一枝筆對寫班固燕然銘張侯爲兄沈生弟顧陸同時妙無比彈碁握槊儘娛嬉話未逢時轉流涕長安三月



春冥冥落花飛絮交相縈我與二子幕天席地共遊賞一日  
一醉無由醒夢中嚙語亦佳句五侯七貴爭來聽蒼茫此願  
幾時遂寄書張子先心傾

### 燕臺花

寓感也文章如花隨人所好也

燕臺花花滿枝枝香豔自矜惜葉葉碧雲相護持辛苦花農  
意無已種花盼到花如綺擎出天孫機畔霞洗來玉女盆中水  
窈窕仙姝萼綠華耽粧纖手試盤鴉珠簾十二當風捲侍女傳  
來百種花穠華易得春人羨魏紫姚黃日先眩對影真宜鏡裏  
看回眸恰向燈前見廿四番風幾樣吹傾城情性少人知青棠  
最喜能蠲忿紅藥生憎號可離蘭閨別有人如玉花態癡肥總

嫌俗一瓊寒泉薦水仙綽約凌波看不足更有嬌娃不解愁深  
紅澹白一齊收無端忽惹風姨怒亂擲繁英打栗留飄茵墮溷  
知無限萬點隨波春不管浪說花原絕代姿得知花入何人眼  
翠袖天寒思不禁東皇雨露本無心但教駐景留香國莫問移  
根傍上林

### 燕臺月

懷鄉也旅人思鄉見月愈甚也

燕臺月幾圓缺金鏡圓時玉兔肥冰輪缺處銀蟾沒蟾魄還從  
海上生桂花風裏步瑤京星連河漢光疑濕地近蓬壺影倍清  
棲鳥不定疎林白卷盡羅雲展空碧一片同懸望月心九衢不  
少思鄉客客子思鄉夜漸長暗聞梧葉墮銀牀誰家砧杵淒如

許何處笙歌樂未央手抱絲桐意難寫博山香燼蘭缸燧秋氣  
纔生蟋蟀堂霜痕欲上鴛鴦瓦舊夢尋思廿載前針樓乞巧夜  
開筵花香玉白人三五水遠山長路八千羈緒閒愁了無著漫  
向纖阿怨離索若使清輝夜夜圓素娥何用偷靈藥北斗闌干  
紫闕前南枝悵望白雲邊聊同衛女思歸引不是何郎明月篇

送馮子皋妹婿

唐鳳

之官黃縣

謫去仍蓬島

登州有蓬萊閣

樓臺蜃氣中南雲迎愛日

旋粵迎養

東海溯雄

風鳬舄天原近魚鹽地自豐但存真面目不必問窮通

山尊學士連日枉顧賦呈二首

錄一

花鳥湖山互主賓廬陵老去鬢霜新禁中久識凌雲客江左今  
多立雪人軼事徵來聞見博古歡結處性情真高軒累日尊蕭

寺香火前生或夙因

次韻奉酬南山孝廉

二首錄一

全椒

吳

菊山尊

弱冠曾充上國賓文章未老鬢毛新  
千秋自我無窮事四海如君有數人  
古義濯磨如矢直歧塗面目與山真  
嶺南諸老何曾死高下川陵大可因

酬程春海編修同年見贈

二首錄一

西涯樓畔看花來傾蓋逢君鬱抱開

今夏始晤于西涯酒樓

六代奇文騷

作骨百年交誼酒爲媒參禪直入維摩室懷古同登郭隗臺病

馬蕭蕭鳴欲倦孫陽時爲拂塵埃

余病君數贈藥

南山同年見示大集燈下讀之甚快率成二律奉贈

錄一

歙縣

程恩澤

春海

木川言金名四  
六  
蚓竅聽詩意不平如君瑰麗更縱橫乃知韓杜真源在不放  
蘇黃異態生華首蝶飛衣絢爛扶胥龍蛻骨崢嶸會看萬里  
風雲氣一洗三春涕淚聲

邱長春墓

有序

金主元主皆敬禮之今人以正月九日致祭謂之燕九  
漢庭方士骨成塵燕九年年記令辰不講神仙講慈孝真仙不  
過是真人

後人稱曰  
邱真人

四川營

相傳秦良玉駐兵於此

巾幗勤王亦足豪寧南應愧握鈴韜四川營畔人憑弔猶指桃  
花說戰袍

酬劉芙初編修見贈卽次原韻

篋中詩積千百篇寶氣蒸作藍田烟早年日下舉鳴鶴老向蓬  
島稱癯仙稜稜瘦骨白神駿要我策蹇相聯翩招作詩課鳬鐘鷺鼓  
在壇坫敢摩脆管張么絃蘇米齋頭墨光散思之淚泣雙眸邊  
竟欲尋君話耆舊準備茗椀妨清眠

讀南山孝廉聽松廬詩有作

陽湖劉嗣綰英初

我昔蘇齋讀君篇君才出粵馳雲烟邇來粵才出數輩總讓  
此筆稱神仙國初奇人首推鄺雲鵲書記方翩翩洗硯不  
終抱琴死已殉萬古成神絃海天君自發霞唱君自號唱霞漁者逸  
響高出扶桑邊手君詩卷讀終夜恨不廬畔聽松眠

過邳州詠留侯

報韓心事本精堅滅項興劉却偶然豪傑容顏同婦女封侯恬

退託神仙運籌合在蕭曹上出世還開鮑葛先黃石赤松俱幻耳授書誰見汜橋邊

由金山放船至揚州遂覽平山康山諸勝得詩四首

江心樓閣俯層瀾吳楚蒼茫此大觀兵甲氣銷餘鶴唳波濤聲定有漁竿金山便是中流柱鐵甕曾開上將壇擬訪焦仙同極目蓬萊東望海漫漫

平山堂迴蜀閣頗賢守當年集勝流北宋人才金帶盛西京文字玉杯留祇今煑茗依禪榻自古談詩重選樓更向梅花拜高塚清風大節共千秋

草堂臨眺稱詩家古薜斑斑石徑斜七子高風山對屋

康對山故居

二分明月水圍花空囊有興騎孤鶴枯木無聲集萬鴉留得康

郎餘韻在酒邊猶爲撥銅琶

豪華往事問雷塘眼底蕪城冷夕陽芍藥空開金比豔瓊花不見玉生香數株衰柳烟帆重幾點疎螢露草荒只有玉鉤斜畔月照人歡笑照悲涼

望泰山

早聞五嶽有真形東嶽巖巖出帝庭大聖不言小天下今人誰識古云亭滄溟日上先浮赤濟魯天留未了青濟勝無能空仰止向禽難學愧山靈

望泰山

漢軍 徐 榮 鐵孫

目力知能到幾重馬頭驚看碧芙蓉天門南下陰陽判遼海東來造化鍾四顧且吟青玉案千秋猶見白雲封天公定解



木八言金卷四  
憐腰腳夜賜仙人九節筇

酬吳荷屋侍御見懷

承明留翰墨愛日返林垞秋氣柏臺肅春風蘭膳馨飛鴻勞短  
札倦客厭長亭

余方北上

江月遙相望詩心入杳冥

懷南山孝廉

南海

吳榮光

荷屋

南山古詩人吟詩見風節賦愁鬼曾泣杼憤石可裂

譚詠史  
諸作

故鄉粳稻多

君在京  
思鄉稻

騷客衣裳潔

君愛潔  
苦灰土

欲往從之遊江月

澹於雪

番禺門人沈世良編校

南豐門人趙惟濂校刊

松心詩錄卷五

番禺 張維屏 子樹

道光壬午四月初四日 乾清宮引

見蒙

恩以知縣卽用恭紀

五雲高捧日華明親見

丹毫點姓名信是

朝廷崇學術要將民社界書生材如散櫟官原冷

選臨高縣教諭

天許栽花宦自清何敢鳴琴說循吏但將買犢勸耕氓

次韻奉酬滇生太史見贈

宦海茫茫一葉舟浮沈無定任江流鳶肩敢比周爲客

年來數爲鉅公

草奏御文字猿臂休談廣不侯師友惜余不入詞館三楚煙波連鄂渚九霄風

月傍瓊樓君人也南書房偉才豈獨工詞賦事業期君督八州

送南山大令之官楚北仁和許乃普漢生

神山風利忽回舟直下長江萬里流天遣詩人作循吏我知

民命待賢侯不妨遊戲雙鳬舄莫話文章五鳳樓聞道波濤

瀛海濶何如吟嘯到黃州

自京抵楚述懷五首

欲去身如不繫舟客心先赴楚江頭休誇仙蹟題黃鶴但恐塵

容愧白鷗裝壓珠璣篇什重朋舊賦詩贈行歌成金縷酒痕稠吳嵩少水部紅

生孝廉優於西郭製新詞一闌海東亦有蒼岑契高麗李怡雲囑周菊人索余詩翰墨緣多未

易酬

萬枝高柳唱新蟬一雨涼生五月天易向滹沱求麥飯難從燕

趙觀嬋娟龍興真見空中佛真定龍興寺菩薩像高七丈蝶化虛傳夢裏仙

邯鄲有黃梁仙蹟昨過伏城逢野老半酣談到伏羲前伏城驛相傳伏羲生處

銅臺片瓦了無痕漳水東流似馬奔疑塚波濤吞佞骨曹瞞疑塚故

居祠廟耿忠魂湯陰屈肅武廟鶴來縈澤聲猶壯竹繞淇泉影自繁詞

賦鄒枚俱寂寞不須懷古訪梁園

一曲銅鞮聽未真登舟且喜少緇塵徧管河漢江淮水春自江淮入都

夏山河漢抵地敢謂東西南北人落日易寒孤客影亂峯如截苦吟身

襄陽白首多耆舊倘許躬耕願卜鄰

半年蹤跡等萍浮吳越燕齊又楚遊世路風塵催短鬢江天雲

樹寫高秋英雄割據終分鼎主客逍遙且放舟明月一輪波萬

頃此身無定在中流

漢陽晚眺

大別山前望斜陽萬瓦明西風吹漢水秋色滿江城鸚鵡才何益魚龍氣未平時有災黎紛在眼不忍濯塵纓

秋夜登黃鶴樓

萬古碧天月三秋黃鶴樓仙人不可見江水自東流玉笛吹何處風帆去未休浮雲與孤客身世兩悠悠

壬午湖北鄉闈分校二首錄一

堂開衡鑒倚丹岑

衡鑒堂後卽鳳凰山

隔一重門似海深十九年前辛苦

味二千篇內琢磨心

每房頭場卷六百餘篇文二千篇有奇

獻來玉美初離璞揀

去沙繁怕掩金爲有孤寒翹首待夜分把卷重沉吟

黃梅春感

去年此日過吳閭，短簿祠邊共泛觴。  
紅豆寄人千里遠，黃梅留我一春忙。  
衝途迎送身如葉，八省通衢豪氣消磨鬢有霜。  
却上孤亭懷俊逸，後逸亭相傳鮑參軍故蹟草痕詩思滿斜陽。

催科

腐儒懷抱易悲酸，纔說催科側肺肝。  
赤子最防疴癢隔，蒼黎休作宰官看。  
讀書讀律吾俱拙，廉善廉能古已難。  
勸爾早籌完國課，官安先要得民安。

黃梅大水行

東去連鄱湖，西來通蜀江。  
邑當吳楚交，其南卽潯陽。  
由春以及夏，恒雨無時暘。  
始慮損禾稼，未料傷隄防。  
何期雨不止，江漲非

尋常衝泥急奔赴寢食不暇遑捐貲集畚築那復愁空囊千夫  
共邪許歟力相扶匡豈知盡人力未克回天殃一決數千尺頃  
刻成汪洋富人豫綢繆舉室遷高岡窮民無所之結茅傍菰蔣  
賤子忝邑宰憂勞職所當小舟犯駭浪沿堤散乾糧飛書報大  
吏章奏陳

大開

憂心原赤子

恩特逮窮氓發帑拯彫瘵蠲賦蘇痼瘡大小四十員治事誠周

詳至梅邑辨災自方  
伯以下凡四十員

青蚨按戶口白粲盈筐饑黎十數萬庶

幾免流亡賤子筋力盡微命仰吳蒼自夏以迄秋艱苦鳴備嘗  
轉憶始涉險堤潰水若狂是時夜將半月黑星無光急流衝一

葉得樹危而康舟幸不破碎死生判毫芒

余出撫鄖舟爲急水所衝力抱大樹乃免

於一身詎足惜萬民良可傷比聞川漲盛汎濫及湖湘又聞吳

越間淫潦淹村莊天公憫黎庶蛟鼉敢鳴張所望千里流旱注

百谷玉聲鳴雁澤聚修築鳩工良會看鼙鼓集復見虹堤長葦

事有能苦余方束輕裝

寶松溪來道修是余奉檄攝篆松滋

梅民苦念我相送立

周行我雖出坎險臨行轉徊徨中年歷憂患境過安敢忘緬懷

饑溺意惻愴留篇章

### 題南山黃梅拯溺圖

蕭山湯金釗敦甫

我讀黃梅大水行情辭悽惻爲吞聲我閱黃梅拯溺圖心目  
驚慘長嗟吁霖雨四月勢不止狂漲三丈陡然起上江下湖  
合併來決隄排屋須臾耳縱有千夫畚鍤功孰禦萬頃波濤



衡干村萬落成巨浸巢山棲木磬哀鴻偉哉張使君應變有  
膽識一舟旦暮巡萬姓餽糧給慮事精且詳赴機敏以力瘡  
痍籌其安身命不遑惜大吏得報查災來隨員委員兼興臺  
庖丁奏刀因歎郤販得實濟民忘災使君一詩人經濟優如  
此乃知誠求心可以保赤子量移廣濟辦漕務使君逡巡辭  
以固不願集菀甘投閒世人那得知其故讀書自昔懷孤忠  
作吏於今得展布濟世豈辭艱大投立志敢緣溫飽誤已饑  
已溺憂民心時陽時雨祈天忱如傷在抱何日釋圖陳座右  
當官箴

奉題南山同年黃梅拯溺圖卽送之官武林

侯官 林則徐 少穆

漢南江介舊飛鳧萬戶流離隻手扶自信催科輸撫字儘教

舞隊換來蘇孤舟野水詩成識元酒甘瓠頌豈諛聞道楚民

方望歲使君何事愛西湖

君新授湖中郡丞

披圖抵觸大江東昔歲陽侯虐正同

泰末江南大水與此同時侯適承乏其地別

幟漫傳稱佛子成橋何術渡朱蒙魚頭夢醒驚蚯蚓蟻穴防

疎負雁鴻君過河淮憑問訊元圭曾否告成功

道光戊子仲冬將發羊城南山年丈出黃梅拯溺圖屬題

時治裝匆促無暇握管歸舟無事乃續成之

常熟

翁心存

送龔

磬磬澤中雁啞啞城上烏開緘鐙燄碧一幅流民圖江流莽

無際雉堞周遭孤銀濤卷島嶼雪浪浮村墟居民蟻緣蛭或

負擔或趨田園已蕩盡母子猶相扶至今側耳聽髣髴聞嗟  
吁誰爲還定之張侯起番禺惟侯蒞黃梅攝篆初治邑吏民  
識王尊童子迎郭伋太歲在昭陽淫雨過百日江漢從西來  
怒遏水倒立其南匯彭蠡九派呀噓吸長隄紆一綫計里逾  
九十庫薄形已危衝齧勢尤急侯也籌之殷捐金亟補葺下  
楫千鎚喧舉鋪萬指集拊循忘寢興踴躍冒炎溼數定功難  
施力窮坊竟墊白日覆鼉騎黃昏神鬼入下弦月正晦野黑  
陰濛濛墳原變巨浸閭井成深隄黔黎十萬命險欲填龍宮  
指揮豫遷避實賴侯之功幸猶存骨肉遑敢悲孤窮侯乘一  
葉舟誓與百姓同振饑備餽餌禦溼儲鞠踴中流觸亂石引  
船遇回風斗落箭離筈眩轉雲飛蓬失手那可掇性命洪流

中官清蛟龍伏天遠精誠通入險復出險登岸心忡忡歸來  
操簡牘臚實陳大府大府動咨嗟飛章奏

常寧上官絡繹來騶從逮牧圉侯曰毋擾民於我乎授精維  
時方炎歊紀序逢夏五瘡痍已蒿目瘡痍矧露處不有蔭暘  
恩那免揭竿聚侯曰毋苦民便宜發倉庾貸粟戶一鍾計食  
人三鬴時時佐肉糜稍稍雜糲救咄嗟指顧間百事無不舉  
是歲江流漲汎濫徧吳楚葺城探赤丸制梃驅碩鼠柴桑咫尺  
地統如打五鼓茲邑風何淳竟忘流離苦村農告其兒老  
嫗顧謂女汝勿愁飢寒張侯能活汝左餐而右粥庶幾莫余  
侮首尾百日間帖然獨安堵展圖意忉忉攬筆重徘徊念我  
先君子秉鐸東海隈丙寅夏五月夜半河隄開建領東北注

河水天上來六塘失故瀆萬井沈寒灰伊廬沒山腹湍激聲  
如雷先人雖閒曹捧檄亦振災輕舸穿樹杪檣櫓俱爲摧力  
微多掣肘紆鬱邱山隤至今秦東門尸祝薦醪醑古人重荒  
政治理經權賅行藏固有命德業貴自恢君今彈祥琴切切  
有餘哀行展富相策廊廟方需才

### 五祖山

達摩從西來心法本一燈五葉分兩枝北秀而南能我聞大滿  
師夙根轉孩嬰隔世受衣鉢入門鐘自鳴至今五祖山法雲護  
層層茲來三藐地不問般若經不談風旛義不講大小乘但求  
施佛力寶筏濟眾生善哉菩提心詎忘桑梓情

五祖黃梅人

### 赤壁

樵夫漁子識髯翁二賦流傳萬口中造物多情贈風月江山如  
夢憶英雄鶴飛欲掠秋濤白龍睡猶驚夜火紅故壘不勞分遠  
近

昔人論赤壁有四處戰爭陳迹總沙蟲

### 曉發武昌

節候過重陽衣霜楚岸霜秋聲千樹急曉色一星涼水患傷新  
蔡山形壯武昌心勞身轉健不必佩萸囊

### 雪堂歌

有序

雪堂在黃州府署今秋樸園太守有雪堂拜坡公之約  
余九月過赤壁太守散賑未歸比太守歸雪堂而余已  
抵荊州十二月十九日坡公生日太守設祀於雪堂余  
在松滋因爲雪堂歌奉寄

二十年來拜笠屐空向畫中尋亦壁豈知流落走風塵今秋忽作臨皋客峯巒層疊送遙青樓閣參差倚空碧地勝宜招翰墨

綠堂高欲壓鼉鼉宅

今赤壁有二賦堂

孤鶴南飛夢已醒大江東去今

猶昔三分事業火雲紅二賦光芒秋月白鐵板銅琶有妙詞風檣陣馬無陳迹逝者如斯不可留惟有清吟意堪適黃州太守

古性情百無嗜好有詩癖行旌所至但飲水洗出新篇露肝膈

黃梅事過尙關心青李書來數相憶雪堂此日熟瓣香尙有紫

裘腰短笛詩成直上快哉亭一笑應思張夢得

宋人張夢得建臨皋亭

奉答南山大令見寄雪堂歌

寶坻

李光庭

樸園

人生嗜好殊難期酒人愛誦詩人詩南山詩名播海內尚江克嗣非君誰仙才小試黃梅縣我到齊安成拙宦江湖漂泊

話三生文字因緣詩一卷上游察吏重廉能未許歸縛雙行  
滕松巢穩跨橫江鶴鱸膾空思張季鷹南山乞假歸省大憲慰留之旋調署松滋  
一勺清泉與君別奔馳空負西園雪子與南山別於旅次賴有梅花作  
主人古歡時與坡仙結書來寄我雪堂歌快誦滿浮金叵羅  
江山風月常如此醉意吟情將若何

### 荆江雜詩

乍別荆南地仍留楚北身攀輿民載酒

御松滋事行路我知津

詔許遷新邑書應報老親日歸猶未得不是戀風塵

交代未清

波遠浮天去舟輕任水流帆檣趨鄂渚烟樹隱荊州重鎮應先  
據長江控上游古來爭戰地岸葦響颼颼

澤畔人何悴蘆中士固窮兵戎悲浩劫騷賦託孤衷癡夢談雲



雨荒途間渚宮不隨人事改江水自流東

舟發荆河口帆開望洞庭君山聳遙碧天水混空青易約仙人  
醉難邀帝子靈風前奏長笛應有老龍聽

江夜聞楚歌

髣髴楊枝又竹枝江空月黑費尋思湘中帝子魂歸處垓下英  
雄淚墮時沉正澧蘭秋欲老繁絃急管夜何其四愁本是吾家  
物不聽清商鬢已絲

江夜聞楚歌

嘉應  
宋湘  
芷灣

莫是宮中舊舞腰聲聲餘恨咽前朝英雄兒女處兮曲落日  
哀猿下里謠詞客有魂留夜渚孤舟無伴讀離騷如何一副  
千秋淚不唱吾家大小招

乙酉楚關分校二首

錄一

鎖院嚴扃靜不譁  
十房排列似蜂衙  
冰心敢忘三條燭  
霧眼重披五色花  
自有葩經供組織  
顯爾之事父三句文多用詩經  
要從荆璞辨瑜瑕  
八千矮屋同看月  
今夕何人不憶家  
是日中秋

宋玉墓

搖落清秋日蕭條  
楚水鄉風騷遁屈  
子雲雨動襄王壤  
薜埋荒塚穠花失  
古牆大招猶可續  
不必問高唐

登峴望鹿門隆中諸山

碑失羊公在勲名  
自古今雲開峴山  
靜水落漢川深卓  
爾鹿門隱悠哉梁  
父吟昔賢俱不死  
何必淚沾襟

襄陽大隄

芳草碧萋萋遊人上大隄曉霞明峴阜春水暖檀溪形自襄樊  
勝名誰羊杜齊歌樓今寂寞

相傳明季此地歌樓酒肆十餘里

休問古銅鞮

隆中諸葛武侯祠二十韻

漢業偏安日英雄並起時南陽龍尚卧西蜀鼎誰支三顧旁求  
切千秋遇合期先幾圖割據數語決危疑魚水關天意蠶叢關  
地基雍容儒者象開濟帝之師管樂真無忝孫曹孰敢欺託孤  
肩鉅任籌筆運長規國步金刀促臣心水鏡知躬耕甘澹泊勝  
算出神奇江上風能借軍前扇自麾匡居多抱膝盡瘁少舒眉  
慘淡星芒隕蒼涼石陣遺草廬留故址蘋薦肅菰祠彷彿吟梁  
甫徘徊讀古碑簡書畏猿鳥畫壁壯旌旗

祠壁繪三國故事

遠志雲霄

羽高文訓誥辭淵源莘渭接韜畧虎熊施廟柏材原大樓桑影

莫迫近尊羊杜躋宇宙共昭垂

習池新柳

襄水一帆歸

時歸自黃州

攜壺訪習池新栽百株柳解作短長枝

畫襄陽春曉圖奉寄南山司馬并系以詩

吳縣

黃均穀原

朝來堤上踏晴沙樹裏遊人笑語譁一幅襄陽好圖畫周桑

張柳蔣桃花

共皋太守樹桑南山司馬栽柳隋川大令種桃

南海門人李長榮編校  
南豐門人趙惟濂校刊

松心詩錄卷六

番禺 張維屏 子樹

清濠

生長清濠十九年

乾隆庚子生於清水濠

中間賢里向西遷

嘉慶戊午遷居賢樂里

今朝又卜清濠宅

道光丁亥復遷於清濠

重話兒時一惘然

清濠新居在舊居之東數百步後有聚賢坊曰聚賢者蓋

謂南關前後五先生也率賦一詩

大有濠梁意城濠近屋垣前賢餘韻在咫尺是南園

西征四首

錄

詔遣關西將前驅最銳兵隊圍六花陣勢列八風營飛渡河無

阻

七甲河

懸臨地欲鳴

關用掛勝

四城齊克復鑼吹助歡聲

絕寒金箱動陰崖鐵蓋山推

九重操勝算萬里縹緲雲

威逾赫眈眈狀可哀但懸邛支首不築憫體臺

正月六日蕉園宮保枉過余適出城賦此奉報

輕陰如霧忽吹開郭外提壺鳥語催花埭春邀雙槳去草堂人話八驕來將軍威重曾平寇元老情多劇愛才詩債隔年猶未

了去冬公以遊山詩屬和尚未脫稿仙心飛上鶴舒臺

梅嶺

萬綠擁關雲雲中兩界分山開唐宰相嶺屬漢將軍節物看梅

子鄉心數雁羣南宗留活水嶺有泉相傳六祖卓錫處不斷澗邊聞

西湖放歌

名山五嶽何時遊復來西湖弄扁舟舊雨今雨座中集魏春松侍御家

雲集南峯北峯雲外浮畫船移向孤山泊提壺直上巢

居閣地勝能栽異代梅詩下年語君補種梅花亭空不返當時鶴白公去

後蘇公來雙堤六橋花爛開金牛之湖尚無恙銷金之鍋安在

哉中州不住西洛往南來忘卻燕雲路夜楊人簾蟋蟀燈秋墳

鬼嘯冬青樹鐵弩三千空爾為金牌十二尤堪悲墓前頑鐵擊

不碎雨打風號無了期世間何物無成敗老佛年深亦更改靈隱

寺新湖上烟雲變態多舊時顏色青山在浮生何必多煩憂

亦勿弔古生羈愁此湖此酒可一醉對酒卻復思前遊草木未同林月亭

汪益齋金前遊念我同袍客兩在天南一天北欲話勞人方寸

心恨無健鳥雙飛翼吁嗟乎百歲幾人能得閒飢驅我又辭故



山西湖雖好不足舒遠抱會當青鞵布韞五嶽窮躋攀願隨鴻  
鵠翔寥廓一快意安能如轅駒櫪馬使我跼蹐不得開心顏

### 范文正公祠

宋代推賢輔行人拜古祠誰能將相業早定秀才時胸抱熊羆  
足威名草木知義田良法在豈獨一家師

### 平山堂

玉簫聲裏畫船移船過虹橋兩槳遲多水石間多柳色有樓臺  
處有花枝廬陵觴詠成千古司李風流又一時漁洋紅橋脩禪歌吹銷  
沉明月在二分留照入新詩

### 龔定盦舍人

自珍

### 招同諸詞人集龍樹寺

老樹百年柯葉改天龍一指春長在

前明龍爪槐無存寺僧補種一株

酒人醉

眼半模糊一片蒹葭綠成海樓頭簾卷西山青座中簪盞皆豪  
英主人好客善選勝此地壓倒陶然亭

寄巢吟社歌爲徐蓮峯編修

寶善作

大千世界同一巢或爲鷗鵬爲鷦鷯百年一瞬等寄耳須彌芥  
子皆空泡大塊刁調宜噫氣吾曹各自鳴其意口比鐘鏘固足  
豪小若笙竽不嫌細古人多似恒河沙至今不死傳詩家住篇  
俊句性情兒想象歡笑還咨嗟千秋寂寞名何用適意眼前且  
吟弄月地花天集故人持螯翦韭開新甕建安才子徐偉長玉  
山家學勤縹緲尊甫闕齋先生有玉山閣詩文集顓風緝雅有詩癖攬環結佩  
登詞場京華本是才淵藪苔岑易得同心友相逢意氣逐雲龍  
相望光芒燭星斗秋陰壓屋風掃開登高望古方徘徊郭隗樂

毅呼不起一杯且酌黃金臺祝爾怡園安在哉當時冠蓋同飛

埃尚留韻事在人口始知富貴輪清才

康熙中徐健菴尚書大會諸名士于祝園維正

間王載揚徵君大會鴻博諸君于怡園

遽廬傳舍均如寄墮溷飄茵從位置絳霄

鸞鳳白鸞騰碧海鷗鷺亦遊戲我將一葉浮江湖

余將南旋東勞西

燕傷鵲孤故巢遠隔聲不隔海天萬里遙相呼

星齋待詔畫竹嶼閒雲圖并詩見貽賦此奉報

詩夢伴涼綠

卽用見贈句

素心知者希風前吟妙句天際忽思歸畫

意在空谷秋痕生夕暉何時同佇月一爲理金徽

君善鼓琴有夜靜竹涼月

抱琴坐深綠之句僕既得詩畫更欲一聆琴音也

爲南山司馬畫竹嶼閒雲圖并題句奉贈

吳縣

潘曾瑩星齋

君心淡似雲君詩秀於竹擾擾人海中幽情托空谷我讀雲  
泉歌羨君抱清福自坐修竹軒涼意滿溪曲一別七千里悵  
望好林麓爲君寫此圖秋心寄尺幅蒼翠空濛中嶺雲自相  
逐何時續清賞小結三間屋醉月騎青鸞看山引文鹿倦枕  
白雲眠詩夢伴涼綠

夜宿澄懷閣

不覺來天上天河在樹間主人香案吏

漢生侍講

招我芰荷灣地峻

三霄接樓高萬綠環口憐蒲柳質又點

紫宸班

明目引見

太白樓

招得青天月來登太白樓南池通一水東望共千秋李杜不可

作山川終古留二公吟賞地詩句莫輕投

天津望海歌

瀕滌乎大哉溟溟萬萬不知所紀極波濤盡處定有方壺員嶠  
兼蓬萊乾端坤倪直通一氣混沌竅曰沐月浴幻出百寶金銀  
臺齊侯觀之不欲回秦皇望之不敢渡吾曹異想天爲開無底  
之淵忽有路將使安期導我行章亥偕我步約廬敖以同遊訪  
徐福之舊寓源析木之高津翫扶桑之大樹龍藏不暇顧海市  
無足觀身是博望之聞孫欲泛靈槎狂天門不覓支機石亦不  
尋河源要凌九霄覽八極坐看大瀛海水淖涵瀟灑周無垠四  
海之外復有海汗漫何從叩真宰道逢麻姑一問之滄海桑田  
幾更改倦遊兮歸來三山兮徘徊珊瑚波紅蜃脂綠青銅萬里

無氛埃巨壑昂然補骨陰火陽冰互開闔吐珠之蚌吞舟魚  
俯視何曾見織物元虛一賦安能窮放歌且勿驚鴻濛欲從東  
海歸南海請息南風轉北風

婁妃墓

隆興觀側江邊路風中蘭麝幽香度

相傳墓有異香

片石流傳幼婦詞

行人指點賢妃墓桐圭不靖逞干戈詩諫難回竟渡河狂謀妄  
欲追成祖弱質真甘學孝娥玉骨冰肌投水府江神也識芳心  
苦特助回腸挽去淵要送貞魂歸故土沙上漁家見忽驚千條  
紙結認分明墓門有草成青塚墳樹何人表女貞古來成敗東  
流水每恨傾城慳一死枉留廟貌說桃花空有宮詞記花藥何  
似英靈燭夜臺生前巾幗不凡才已拚激烈埋魚腹莫惜嬋娟

比馬嵬雙碑先後羣公拜年深風雨苔垣壞宋玉梅生觀察殷勤護

舊塋頌榮恩濟大令鄧車標新界南浦西山烟靄中眾仙環珮幾時

逢不須別撰迎神曲但唱秧歌學老農

壬辰江西鄉闈分校二首

楚材兩度助搜尋壬午乙酉是間分校文字緣新章水深五色丹黃迷老

眼廿年辛苦憶初心匣中看劍知難掩波裏求珠恐易沉坐到

宵分猶把卷小窗燈火古槐陰

八千餘卷手勤繙星使殫心報

國恩圭璧自能彰異采梗枿猶慮鬱深根襄陽五字詩情遠詩題

江清月近人錢文端公手植雙桂文端號香樹香樹雙株韻事存錢文端公手植雙分校今年添

掌故小臣稽首效鵬言正考官出缺是科江西鄉試進呈錄副考官撰前序屏撰後序

廬陵王氏兩世孝子詩 二首錄一

廬陵美談播閭里王家孝子

光昇

生孝子

殷堦

幼讀論語淚欲

流父母惟其疾之憂父母之疾誰憂之聽師講書問於師長大  
孝父母孝行難悉數父患癰足有疾數載扶持不離膝母患疽  
疽已成吮膿拔毒疽頓平孝子愛曰心無窮老親天年數有終  
親終廬墓在親側朝獻茶分夕獻食林樹颯颯山風哀夜深猛  
虎咆哮來孝子知哀不知懼虎亦垂頭掉尾去墓前桐杖忽吐  
芽兒者驚歎爲咨嗟枯桐復生猛虎避至孝真誠感異類  
聖朝旌典表厥異吁嗟乎孝可風兮况兩世

甲午四月二十三日重登黃鶴樓張

德助

李

藩兩孝廉余

楚闌分校所得士也是日置酒樓上酒罷有詩



頭陀寺外轉風輪，鵬鷁洲邊幾度春。一去仙乘何代鶴，十年吾

是再來人。滄桑過眼談塵劫，

兩生云：楚北連年水患，田廬多損壞。

雲水浮蹤悟客

身，且喜提壺逢舊雨。此間三醉亦前因，

曾三飲於此。

匡廬道中

雨意在前峯，白雲如白龍。斜陽忽倒映，萬朶金芙蓉。坐石見飛瀑，隔溪聞暮鐘。東林今夜月，蓮社憶高蹤。

登天池山

穿雲九十盤，漸及山之肩。是爲匡廬背，天池蓄天泉。自辰迄於申，冒險躋其巔。峩峩九蓮峯，俯視墮我前。大江似編帶，墨點知江船。吳楚青濛濛，不辨雲與烟。琅然天風來，鸞鶴相迴旋。對面招五老，舉頭呼四仙。我身已天上，不信猶人間。

廬山觀雲

匡廬控江湖山川氣摩盪大雲如大裘匝地百千丈蓬蓬蒸金  
甌縷縷疊繪纒憑高俯下方一白失萬象迴颺忽吹動銀海湧  
微浪少焉雲漸開刻露出異狀田疇畫棋枰草樹列錦障峯巒  
生足底獨客神忽旺臨風發浩歌松巔答樵唱

開先觀瀑

天上白龍厭拘束奔下人間作飛瀑天潢屈注送龍來風卷鱗  
而散珠玉我從雨後行穿雲咫尺人語皆無聞轟崖震谷勢何  
似項羽大破章邯軍嚴冬閉蟄驚雷電長夏炎蒸飄雪霰何物  
巨靈逞奇變帝命山靈鑄雙劍瀑頂有雙劍峯欲截飛流截不斷萬古  
天紳垂碧漢

聚仙亭題壁

仙聚幾何時仙散在何許問仙仙不言松花落如雨

青玉峽瀑布歌

禹權不到層崖巔匡廬尙有洪荒泉

廬山舊志紫霄峯石室禹刻蝌蚪字可辨者洪荒漢

子乃權六字

此泉終古瀉不盡穿巖注壑爲深淵匡君兄弟厭喧聒

神鞭鞭石當空壓此石媧皇鍊未成漏出飛流闢雙峽洞庭龍女張機絲鮫綃織就人不知要學麻姑弄狡獪擲下千丈明珠一客高談一客喜喜向此間悟微理蠡湖水氣蒸作雲雲上匡山復爲水水雲旋轉相終始山澤氣通古如此

王文成公紀功石刻

出師不待詔忠義切同仇事類摘吳淞人真繼武侯飄然廬嶽

去宛若赤松遊邦國方嘉靖碑成異識留

石刻有嘉靖邦國之語後二年世宗國號

嘉靖碑  
異也

### 太白讀書堂

謫仙仙去乘雲輶書堂壁立凌青霄謫仙不死堂不朽堂邊萬  
木鳴刁調斗酒百篇足嘯傲人言太白仙才高嗚呼才高乃爲  
患世人欲殺勞心忉我不願學仙才超亦不願衣宮錦袍但願  
學得青蓮一雙眼眼光識得人中豪當年汾陽若非太白救頃  
刻斧鉞安能逃不解何以一見罪囚便識是人傑得非謫仙耳  
目殊凡曹不然長庚星精有神算預知應家社稷將動搖異哉  
天生中興一名將死生之柄忽令詩人操我又不解仙才不免  
夜郎謫可歎世間王侯第宅自古多腥臊雖然永藩力士輩白

也視之同秋毫卽如沉香亭北捧硯有國色亦似名花過眼遭  
風飄仙乎仙乎興酣落筆搖五嶽至今想見十洲三島游逍遙  
下視舊時讀書處匡廬一點有若烟中泡

棲賢寺舍利歌

棲賢古寺有舍利顆粒大小形質異相傳舍利本有塔自宋咸  
平庚子歲天然尊者大辨才序繼以銘千百字客來觀者皆讚  
歎我發狂言君勿異天有舍利日月星人有舍利心虛靈三光  
常令萬物覩寸心能使萬事成佛寶舍利作何用我聞如是爲  
精英似麻似豆似桐子非玉非石非水晶佛法神通貴濟世曷  
不到處施光明窮人長夜苦黑暗普照可代燭與燈色空空色  
但演說嗚呼舍利徒虛名嗚呼舍利徒虛名此寶何足爲重輕

棲賢三峽橋

峯迴磴折交盤紆眾泉石罅來徐徐山根漸下泉漸合初似百  
斛傾明珠從來矜高必易跌忽然破碎千瓊瑤泉流愈盛氣愈  
怒勢若萬馬爭前驅奔騰縱逸不可止豈肯復受銜勒拘小石  
侏儒竟滅頂大石屹立當關夫泉來石拒乃壅戰如伐鼓馳  
雷車石能剛克水不敵水犀軍潰鵝鵝呼偶逢平處快一瀉滑  
比雪乳投冰壺臨流我愛坐苔石曠然心境皆清虛塵纓未忍  
濯淨綠玉茗真合烹芳腴橋名三峽意可會此水何異穿夔巫  
更錫嘉名小蜀道試畫縮本瞿塘圖

自棲賢寺至三峽橋一路水勢余戲名之曰小蜀道

乙未江西鄉闈內監試中秋對月有作

四載中秋月三回試院看科名萬心熱風露一輪寒覓句宜煎

茗思鄉正倚闌

兩兒鄉試

戰場吾慣歷壁上又來觀

番禺門人沈世良編校

南豐門人趙惟濂校刊

松心詩錄卷七

番禺 張維屏 子樹

南康郡齋

道院江東著

昔人目南康郡署為江東道院

政閒心自閒勝緣憑造化為吏住

名山

朱子與宰相書云今以造化之力得為吏廬阜之下

判牘烟霞外尋詩水石間自慚

衰朽質無力叩賢關

六老堂

六老者五老峯與朱子也

初見匡君客路長

丁卯北上過廬山

再尋廬嶽鬢毛蒼

甲午轉餉楚北歸遊廬山

名

山許訂三生石

今權郡事三遊廬山

末學慚居六老堂欲濟鴻鰥無善策

敢云燕寢有清香且憑歌嘯舒懷抱今古詩篇共一囊

時輯廬秀錄

五老峯



斗牛如可捫星渚見天根秀出西江迴高齊南嶽尊觀河同皴  
面閱世久忘言五位真相得蒼然萬古存

歲暮出城

管領湖山近歲除出城多半爲匡廬籃輿自愛攜書卷也看青  
山也讀書

李蘇二公祠

有序

太白東坡皆遊匡廬而山中不聞有香火道光乙未仲  
春余創建李蘇二公祠於廬山秀峯寺祠成設祀爲文  
勒石并賦一詩

此地青蓮座眞宜坡老陪匡廬千古秀唐宋兩仙才對景思椽  
筆迎神獻玉杯驂鸞還駕鶴縹緲接蓬萊

陶白庵

有序

余生平慕陶淵明白樂天之爲人去秋權守南康日對  
匡廬陶公栗里白公草堂故址雖湮流風宛在因卽郡  
齋書室顏曰陶白庵懸二公畫像于室中焚香獻酒瞻  
仰之餘喟然有作

我躬寄宇內數十寒暑間眇若海置粟疾如箭在弦不願學仙  
佛不能希聖賢爲工之一藝爲農無寸田人皆目以士自顧亦  
愧焉居然學干祿釋褐爲宰官催科固所拙撫字復多愆區區  
愛民心不忍加笞鞭四載留西江汎汎江中船今春權郡符再  
結廬山緣往歲山之北直造天池巔今年山之南親見五老顏  
一條俯江練萬頃觀海綿灑墨剡石壁

余書不息二字山  
僧鐫於青玉峽上

烹茶

汲玉淵

坐三峽石取玉淵泉烹雲霧茶

新庵奉香火

陶白庵

高祠陳几筵

李蘇二公祠

仕宦境雖滯山水緣未慳吁嗟此山水昔賢所留連昔賢皆不朽名竝匡廬傳鯁生性所近瓣香意拳拳陶公與白公瞻之儼在前神遊羲皇上心放湖山邊閒來酒一樽興發詩一篇敢云追往昔庶自樂其天

匡廬三疊泉出於宋紹熙在朱子守郡之後朱子以不得見爲恨然余聞羅浮人跡罕到之處有泉十三疊則此三疊不足異也適與山僧談瀑布之勝僧以紙求書因走筆書四十字與之

廬瀑泉三疊前賢歎絕奇水傾銀鑿落龍戲玉之而更話羅浮勝泉奇實倍之縱橫十三疊此境少人知

鹿洞書院示生徒

名教有樂地洞關匡山陞二李去已遠  
荒榛掩頽基南唐至南宋滄桑幾興衰  
紫陽來守郡修復教在茲教思實無窮  
千載仰洞規當時陸象山相善亦相資  
後儒講異同辨論成支離大道若大路  
奚必分兩歧實學在躬行豈在口說爲  
但爲君子儒往哲皆可師

六朝松在鶴波觀康熙中猶存  
四株今僅存六株

一橋橫水斷巖塵古觀雲深閉古春爲語  
山靈須保護六株松是六朝人

登黃巖絕頂

姊妹石娟娟迴看鎖碧煙

初望姊妹石高倚天半  
登至半山雙石低不見

雲深僧夢穩

壁峭客身懸寫下走飛瀑杖頭開洞天  
文殊峯上立孤塔共巍然

卧龍岡尋卧龍庵醉石澗尋歸去來館故址皆荒廢感歎  
有作

尙論三代後悅服有二人其一曰武侯體用備一身草廬抱膝  
時躬耕若隱淪三顧慨然出出則社稷臣其一陶靖節飲酒全  
天真詩中露氣骨豈獨含清淳解帶歸去來處則爲天民二公  
不講學行業何精純晦翁守南康望古心相親卜宅岡之陽築  
館澗之濱繪像儼如在朱子卜宅卧龍岡  
畫武侯像寘堂中企石交有神又築歸  
去來館  
于醉石澗有句云  
彼澗中有懷哉千載人嗟余苦頑懦嚮往徒殷勤作詩告來者  
名迹毋使湮

苦竹 有序

苦竹相傳陸修靜所植夢溪筆談云簡寂觀苦筍味反  
甜歸宗寺鹹齏味反淡余偶有會心口占二十字  
愛淡終勝鹹得甜莫忘苦世間知味人請更下轉語

二石 有序

陶淵明醉石陸元德禮斗石合賦一詩

陶石以醉名陸石曰禮斗至今匡廬中石友兩不朽

香鑪峯

昔聞香鑪名今見香鑪面白雲如香煙吹上玉皇殿

佛手崖

老佛立懸崖雲端伸隻手下欲援眾生上欲摘星斗

招隱庵

陸羽著  
茶經處

此地可招隱茶經昔曾著有人遊山來便請喫茶去

相辭澗

李瞻字  
遺蹟

其父勢燄惡

李林甫

其女仙蹟芳至今幽澗中水流花自香

茶話石

石生禪  
師遺蹟

虎邱說法處頑石曾點頭匡山茶話時石亦解聽不

睡足庵

玉潤道人崔  
誠老舊居

結茅隱匡廬一庵睡方熟若比陳希夷此睡未為足

周仙祠

周顒

元祖邱眞來明祖周顒至從來興王興每見異人異

玉淵潭

水動山愈靜雨晴雷更鳴我來磐石坐心似玉淵清

詠瀑

禁川河漢冰雪銀玉珠璣綃練丈尺龍鶴等字

開先高瀑出雲端覓句形容大是難映日青紅添彩色因風飛  
舞得奇觀靜中不斷四時響清極能生三伏寒欲掃陳言成禁  
體試從空處想波瀾

黃巖觀瀑

香鑪

峯煙出紫霞堆雙劍

峯

風生虎氣來誰挽天河向空擲上

方雲水下方雷

黃巖觀瀑再賦兩絕句

欲訪匡君一問之倚天長劍始何時不行地上行天上人道山  
奇水亦奇



千尺遊龍勢蜿蜒能教雷雨出晴天空中飛舞雲中立我道山  
仙水亦仙

建昌捕蝗詩

捕蝗捕蝗于野之東田祖有神請以火攻章一捕蝗于南收之有

法其法維何以蛙以鴨二章皆能食蝗捕蝗捕蝗于野之西崇朝

其雨化蝗爲泥三章性畏雨捕蝗于北滅此朝食及早撲之毋使

生翼四章捕蝗捕蝗購蝗以錢窮民趨利走捕爭先老者一筐幼

者一肩沽之沽之價十百千但願無食民之苗無害民之田吁

嗟乎官敢惜錢五章

南海門人李長榮編校

南豐門人趙惟濂校刊